

## **Intervju sa studenticom Advijom Džambas**

### **Možete li nam reći nešto više o Udruženju Mladice?**

MladiCe su mladi ljudi koji su u djetinjstvu liječeni od raka, a koji nakon svoje životne bitke nisu stavili tačku na cijelu priču, nego su nastavili da pišu nove stranice, ali ovoga puta stranice pune pozitivnih i hvale vrijednih momenata. MladiCe kao grupa uz udruženje “Srce za djecu oboljelu od raka” pružaju aktivnu, trajnu i cjelovitu podršku djeci oboljeloj od raka i njihovim najbližima.

### **Šta je to zapravo Roditeljska kuća, koja je svrha postojanja, ko tamo živi i kakve životne priče se tamo pišu?**

U Roditeljskoj kući žive mali heroji, djeca čije je djetinjstvo naglo prekinuto zbog onog čije ni ime ne želimo da čujemo, a to je kancer ili poznatije – rak.

Ti mladi heroji su tamo sa svojim roditeljima, sa svojom braćom i sestrama, sa svojim drugarima i saborcima u najvažnijoj borbi, borbi za zdravlje, za normalno i sretno djetinjstvo. Oni su tamo onda kada nisu u bolničkom krevetu, kada nisu prikopčani na “čudne kablove”, kroz koje ulazi još čudnija tekućina, zvana kemoterapija.

Roditeljska kuća je svijetla tačka teške priče ovih mališana i njihovih najdražih. Oni je vole, jer tamo nema igle, tamo nema boli, tamo su igračke, mamina hrana, voljeni brat i sestra i mali ćelavi prijatelj koji ih najbolje razumiju.

Tamo je također jedan divan tim ljudi udruženja SRCE ZA DJECU. To su ljudi za koje slobodno možemo reći da su posvetili svoje živote da bi pomogli onima u čiji život je iznenada i nezvano došla ta strašna bolest.

A da ne bude tako strašan brinu se upravo oni, pružaju psihološku, socijalnu i svaku drugu podršku koja im je potrebna.

Tamo smo i mi – MladiCe, mi koji ih također najbolje razumijemo, jer upravo smo mi oni koji su preživjeli ono što se sada njima dešava. Volontiramo, pomažemo timu, igramo se, pričamo, a samom pojavom često kažemo više nego što bi riječi rekle. Mi znamo koliko vrijedi kada vidite živi primjer da je neko

uspio, da se izliječio i da je sada tu da ti pruži ruku podrške. Mnogi od nas su se liječili u period kada MladiCe kao grupa nisu postojale. Nije postojala ni Roditeljska kuća, pa znamo kako boli kada te mama nakon tri sata dozvoljene posjete ostavi i tužnog lica odlazi okrećući se po ko zna koji put, a ti se trudiš da je dodatno ne rastužiš.

Roditeljska kuća, nije to samo obični smještaj da bi neko imao gdje da prespava, to je mnogo, mnogo više od toga – Roditeljska kuća je kuća puna ljubavi, prava porodična, tamo su svi jedna velika bliska porodica. A da bi to sve funkcionisalo potrebna su, naravno, i finansijska sredstva, a koja na veliku žalost nisu sistemski obezbjeđena.

### **Odakle ideja za snimanje dokumentarnog filma “Velika bijela kuća”?**

Boraveći u Roditeljskoj kući, volontirajući, odlučili smo da na neki način moramo progovoriti, progovoriti o našoj populaciji, borbi, udruženju i Roditeljskoj kući, progovoriti radi buđenja uspavanih savjesti.

Odatle ideja za dokumentarni film “Velika bijela kuća” koji je postao naš način da javno progovorimo. Za realizaciju ideje nam je pomogao naš mentor iz Centra za kulturnu i medijsku dekontaminaciju Zoran Zoka Ćatić, a snimatelj je bio Mirza Ajnadžić. Film je urađen volonterski i s velikim entuzijazmom. Mladi su na taj način željeli pokazati da se neprestano moraju tražiti novi načini da mladi javno govore o problemima, ali ukazuje i na mogućnosti za rješavanje tih problema.

### **Ispričajte nam nešto više o odlasku u Dubrovnik i nagradi GRAND PRIX.**

Kada je film finaliziran odlučeno je da ga pošaljemo na 7. Dubrovnik film festival gdje smo ušli u takmičarsku fazu i to je za nas već bio uspjeh. Nakon projekcije na festivalu shvatili smo da to neće biti i jedini uspjeh obzirom na mnoštvo pozitivnih reakcija od strane prisutnih, kako publike tako i stručnih lica iz svijeta filma. Sve je na kraju rezultiralo GRAND PRIX nagradom, koju su izgleda svi više očekivali nego mi sami, jer je to, kako kažu, prvi put da su se složili i žiri i publika. Iznenađeni, uzbuđeni, jednostavno preplavljeni emocijama donijeli smo

nagradu u VELIKU BIJELU KUĆU, a tamo su nas ponosni sa aplauzom dočekali stanari kuće, naš mentor i srce tim.

### **Šta za vas MladiCe znači ova nagrada?**

Na festivalu smo uživali, upoznali divne ljude i sklopili nova prijateljstva, a nagrada je samo dodatni motiv da postignemo zacrtani cilj, a to je RAZUMIJEVANJE I PODRŠKA za ono što je “Velika bijela kuća” i za sve što se u njoj dešava.

### **I za kraj kada će dokumentarni film “Velika bijela kuća” biti premijerno prikazan publici?**

Dokumentarni film “Velika bijela kuća” biće premijerno prikazan publici početkom mjeseca decembra u Cinema city-u u Sarajevu, te ovim putem pozivamo sve zainteresovane da dođu na premijeru filma, te da pruže podršku ovim malim herojima.